

Na osnovu člana 38. Statuta Komora medicinskih sestara-tehničara Zeničko-dobojskog kantona, broj: 01-15/2020 od 11.09.2020. godine, Skupština Komore medicinskih sestara-tehničara Zeničko-dobojskog kantona, održana dana 21.03.2023. godine, donosi :

PRAVILNIK O DISCIPLINSKOJ ODGOVORNOSTI ČLANOVA KOMORE

I OSNOVNE ODREDBE

Član 1.

Ovim Pravilnikom uređuju se: povrede dužnosti i ugleda sestrinskog i primaljskog zvanja, mjere za učinjene povrede dužnosti i ugleda sestrinskog i primaljskog zvanja, pokretanje postupka za utvrđivanje povreda dužnosti i ugleda sestrinskog i primaljskog zvanja, organi i postupak za odlučivanje o povredama dužnosti i ugleda sestrinskog i primaljskog zvanja i druga pitanja od značaja za disciplinsku odgovornost članova Komore medicinskih sestara-tehničara Zeničko-dobojskog kantona (u daljem tekstu: Komora).

II POVREDE DUŽNOSTI I UGLEDA SESTRINSKOG I PRIMALJSKOG ZVANJA

Član 2.

Povredama dužnosti i ugleda sestrinskog i primaljskog zvanja smatra se:

- kršenje etičkih principa struke utvrđenih Kodeksom sestrinske i primaljske etike i deontologije;
- obavljanje dopunskog rada na način suprotan odredbama Zakona i Pravilnika;
- donošenje pravosnažne sudske odluke kojom je članu Komore izrečena mjera zabrane obavljanja sestrinske ili primaljske djelatnosti,
- donošenje pravosnažne sudske presude kojom je član Komore proglašen krivim za učinjenje krivičnih djela protiv zdravlja ljudi, podmićivanja i protiv službene i druge odgovornosti, utvrđenih krivičnim propisima Federacije Bosne i Hercegovine.

III MJERE ZA UČINJENE POVREDA DUŽNOSTI I UGLEDA SESTRINSKOG I PRIMALJSKOG ZVANJA

Član 3.

Za utvrđene povrede dužnosti i ugleda sestrinskog i primaljskog zvanja članovima Komore mogu se izreći slijedeće mjere-kazna:

- opomena;
- javna opomena;

- privremeno oduzimanje odobrenja za samostalan rad - licence na period od tri (3), šest (6), devet (9) i dvanaest (12) mjeseci;
- trajno oduzimanje odobrenja za samostalan rad – licence;
- oglašavanje člana Komore nedostojnim za obavljanje sestrinske i primaljske djelatnosti.

Član 4.

Opomena i javna opomena izriču se:

- u slučajevima lakših kršenja etičkih principa struke utvrđenih Kodeksom sestrinske i primaljske etike i deontologije.

Član 5.

Oduzimanje odobrenja za samostalan rad - licence članu Komore izriče se:

- u slučaju težeg kršenja etičkih principa struke utvrđenih Kodeksom sestrinske i primaljske etike i deontologije;
- kod obavljanja dopunskog rada na način suprotan odredbama Zakona i Pravilnika, ukoliko član Komore u datom roku ne otkloni uočene nedostatke na koje je upozoren od strane lica ovlaštenog za vršenje inspekcijskog nadzora;
- u slučaju kada je pravosnažnom sudskom odlukom članu Komore izrečena mjera zabrane obavljanja sestrinske ili primaljske djelatnosti.

Član 6.

Oglašavanje člana Komore nedostojnim za obavljanje sestrinske i primaljske djelatnosti izriče se članu Komore koji je pravosnažnom sudskom presudom proglašen krivim za počinjenje krivičnog djela protiv zdravlja ljudi, krivičnog djela podmićivanja i krivičnog djela protiv službene i druge odgovornosti, utvrđenih krivičnim propisima Federacije Bosne i Hercegovine, i koji se, s obzirom na važnost i prirodu ugroženog dobra ili druge posljedice te s obzirom na okolnosti pod kojima je radnja izvršena, odnosno propuštena, odlukom Komore smatra nedostojnim za obavljanje sestrinske i primaljske djelatnosti.

Članu Komore iz stava 1. ovog člana, Komora može uskratiti izdavanje licence, odnosno može mu privremeno ili trajno oduzeti licencu.

Član 7.

Pri izricanju mjere zbog povrede dužnosti i ugleda sestrinskog i primaljskog zvanja članu Komore uzimaju se u obzir: važnost i priroda ugroženog dobra, težina povrede i njene posljedice, stepen odgovornosti člana Komore, uvjeti pod kojima je povreda učinjena, odnosno okolnosti pod kojima je radnja izvršena ili propuštena, raniji rad i ponašanje člana Komore i druge okolnosti od uticaja za izricanje vrste mjere.

IV POKRETANJE POSTUPKA ZA UTVRĐIVANJE POVREDA DUŽNOSTI I UGLEDA SESTRINSKOG I PRIMALJSKOG ZVANJA

Član 8.

Tužitelj Komore je nezavisni organ Komore koji predlaže pokretanje postupka odgovornosti članova Komore zbog povrede Kodeksa sestrinske i primateljske etike i deontologije, povrede odredaba Statuta, te pojedinačnih i općih akata Komore.

Tužitelja Komore i njegovog zamjenika imenuje, bira i razrješava Skupština javnim glasanjem na prijedlog Upravnog odbora.

Tužitelj Komore radi u skladu sa Pravilnikom o disciplinskoj odgovornosti članova Komore.

Postupak iz stava 1. ovog člana pokreće se pred Sudom Komore.

Rad Tužitelja Komore odvija se u skladu sa odredbama ovog Pravilnika i Poslovnika o radu Tužitelja Komore.

Zahtjev za pokretanje postupka za utvrđivanje povrede dužnosti i ugleda sestrinskog i primaljskog zvanja mora biti u pismenoj formi i isti sadrži podatke bitne za utvrđivanje odgovornosti člana Komore.

Član 9.

Inicijativu za pokretanje postupka za utvrđivanje povrede dužnosti i ugleda sestrinskog i primaljskog zvanja Tužitelju Komore može dati:

- svaki član Komore,
- svi organi i Komisije Komore,
- sudski, inspekcijski i drugi državni organi.

Član 10.

Tužitelj Komore dužan je pokrenuti postupak za utvrđivanje povrede dužnosti i ugleda sestrinskog i primaljskog zvanja člana Komore u roku od petnaest (15) dana od dana saznanja za povredu dužnosti i ugleda sestrinskog i primaljskog zvanja.

Zahtjev za pokretanje postupka dostavlja se istovremeno:

- članu Komore protiv koga se pokreće postupak;
- Sudu časti Komore;

V ORGANI KOMORE I POSTUPAK ZA ODLUČIVANJE O POVREDAMA DUŽNOSTI I UGLEDA SESTRINSKOG I PRIMALJSKOG ZVANJA

Član 11.

Za vođenje postupka za utvrđivanje povreda dužnosti i ugleda sestrinskog i primaljskog zvanja ovlašteni su: Tužitelj Komore i Sud časti Komore.

Član 12.

Sud časti Komore ima predsjednika i dva člana, koje imenuje, bira i razrješava javnim glasanjem Skupština Komore na prijedlog Upravnog odbora.

Sud časti je nezavisni organ Komore koji odlučuje u prvom stepenu o povredama dužnosti i ugleda medicinskih sestra-tehničara i primalja u skladu sa Kodeksom sestrinske i primateljske etike i deontologije, Statutom i drugim aktima Komore.

Upravni odbor Komore medicinskih sestara-tehničara Zeničko-dobojskog kantona je drugostepeni organ koji odlučuje po žalbama na odluke Suda časti Komore medicinskih sestara-tehničara Zeničko-dobojskog kantona.

Član 13.

Postupak Suda časti Komore pokreće se i vodi na osnovu zahtjeva za pokretanje postupka.

Sud časti Komore po provedenom postupku donosi odluku o odgovornosti člana Komore i izriče odgovarajuću mjeru.

Član 14.

Sud časti Komore dužan je sprovesti postupak kada je podnjet zahtjev za pokretanje postupka.

Sud časti Komore upoznaje se sa zahtjevom za pokretanje postupka neposredno po njegovom prijemu i odlučuje da li je potrebno sprovesti prethodni postupak, odnosno prethodne izviđajne radnje ili prikupljanje dokaza.

Predsjednik suda časti može sam provesti prethodni postupak.

Član 15.

Poziv za raspravu pred Sudom časti Komore, članu Komore o kojem se raspravlja kao i drugim učesnicima mora biti dostavljen najkasnije pet (5) dana prije dana određenog za raspravu.

Poziv mora sadržati podatke o predmetu rasprave, terminu održavanja sjednice Suda časti Komore te podatak o svojstvu u kojem se neko poziva.

Član 16.

Rad Suda časti Komore je javan.

Suda časti Komore može donijeti odluku o isključivanju javnosti.

Član 17.

Na sjednicu Suda časti Komore, obavezno se pozivaju Tužitelj Komore i član Komore protiv kojeg se vodi postupak, a ako je to potrebno svjedoci i vještaci koji mogu pomoći u utvrđivanju odgovornosti člana Komore.

Član 18.

U postupku za utvrđivanje povreda dužnosti i ugleda sestrinskog i primaljskog zvanja, član Komore protiv koga je pokrenut postupak ima pravo uzeti branioca.

Branilac iz stava 1. ovog člana može biti svako poslovno sposobno lice koje član Komore angažira.

Član 19.

Prije početka rasprave predsjednik Suda časti Komore utvrđuje da li su prisutna sva pozvana lica. Ako na raspravu nije došao član Komore protiv koga je pokrenut postupak, koji je uredno pozvan, a izostanak nije opravdao, rasprava se može održati i bez njegovog prisustva.

Ako na raspravu nisu došli pozvani članovi Suda časti Komore, kao i član Komore protiv koga je pokrenut postupak, koji je uredno pozvan, odnosno ako su opravdano spriječeni da dođu, rasprava se odlaže.

Na raspravi Suda časti Komore nije obavezno prisustvo Tužitelja Komore i ista se može održati i bez prisustva Tužitelja, ako predsjednik Suda časti odluči da je i bez prisustva Tužitelja opravdano da se održi rasprava.

Odluka o odlaganju rasprave odnosno o njenom održavanju bez prisustva člana Komore protiv koga je pokrenut postupak unosi se u zapisnik.

Kad se rasprava odlaže određuje se dan i sat rasprave i to saopštava prisutnim licima ili se rasprava naknadno zakazuje.

Član 20.

Rasprava pred Sudom časti Komore počinje čitanjem zahtjeva za pokretanje postupka, nakon čega se poziva član Komore, protiv koga je pokrenut postupak, da iznese svoju odbranu.

Svjedoci daju svoju izjavu poslije člana Komore protiv koga je pokrenut postupak. Ako je potrebno može se izvršiti suočenje člana Komore protiv koga je pokrenut postupak i svjedoka.

Poslije svjedoka saslušavaju se vještaci ako ih ima i čitaju spisi, dokumenti i izjave svjedoka koji nisu prisutni na sastanku Suda časti Komore.

Ako na raspravi Suda časti Komore prisustvuje branilac člana Komore isti ima pravo da učestvuje u toku čitavog postupka.

Član 21.

Predsjednik i članovi Suda časti Komore, Tužitelj Komore, branilac člana Komore, mogu u toku rasprave po odobrenju predsjednika Suda časti, postavljati pitanja članu Komore protiv koga se vodi postupak, svjedocima i vještacima u predlaganju novih dokaza.

Predsjednik Suda časti diktira u zapisnik odgovore na postavljena pitanja.

Član 22.

U završnoj fazi postupka se pozivaju član Komore protiv koga je pokrenut postupak da iznese završnu odbranu i Tužitelj Komore da iznese završnu riječ ako je isti prisutan.

Rasprava pred Sudom časti Komore, može se prekinuti i nastaviti na slijedećoj sjednici, uz određivanja dana i satnice za nastavak rasprave.

Poslije završne odbrane člana Komore protiv koga se vodi postupak i završne riječi Tužitelja Komore predsjednik Suda časti zaključuje raspravu.

Član 23.

Sud časti Komore poslije zaključenja rasprave donosi odluku o odgovornosti člana Komore.

Sud časti Komore može donijeti jednu od slijedećih odluka:

- obustaviti postupak,
- osloboditi člana Komore od odgovornosti,
- izreći odgovarajuću mjeru.

Član 24.

Odluka iz prethodnog člana naročito sadrži:

- uvod (naziv organa, sastav Suda časti, predmet rasprave, po čijem zahtjevu je postupak pokrenut, datum održavanja rasprave, datum donošenja odluke),
- dispozitiv (odluka o odgovornosti člana Komore, izricanje mjere, odnosno odluka o oslobađanju člana Komore od odgovornosti ili odluka o obustavljanju postupka),
- obrazloženje (činjenice koje su utvrđene, na osnovu kojih povreda se član Komore proglašava krivim, u čemu se sastoji povreda dužnosti i ugleda primaljskog i sestrinskog zvanja, olakšavajuće i otežavajuće okolnosti koje je Sud časti Komore uzelo u obzir prilikom odlučivanja i druga potrebna obrazloženja),
- pouku o pravnom lijeku.

Član 25.

Član Komore protiv koga se vodi postupak ima pravo tražiti izuzeće predsjednika ili pojedinog člana Suda časti Komore, s tim što je dužan navesti razloge.

O zahtjevu za izuzeće odlučuje Sud časti Komore odmah po postavljanju zahtjeva.

Član 27.

Odluka Suda časti Komore donosi se nadpolovičnom većinom (50% + 1) ukupnog broja imenovanih članova Suda časti Komore.

Član 28.

Odluka o odgovornosti člana Komore protiv koga je vođen postupak saopštava se članu Komore neposredno poslije donošenja.

Ako se odluka o odgovornosti člana Komore ne može donijeti odmah, Sud časti Komore može odložiti donošenje odluke najviše za pet (5) radnih dana, a o zakazivanju novog sastanka obavještava člana Komore, koji ima pravo da prisustvuje sastanku prilikom donošenja odluke.

Član 29.

Odluka o odgovornosti člana Komore dostavlja se članu Komore u pisanoj formi u roku od deset (10) dana od dana donošenja.

Odluka o odgovornosti člana Komore dostavlja se i Tužitelju Komore.

Član 30.

Protiv odluke Suda časti Komore može se izjaviti žalba Upravnom odboru Komore medicinskih sestara u roku od petnaest (15) dana od dana dostavljanja odluke.

Po prijemu žalbe, Upravni odbor je dužan ispitati da li je žalba blagovremena i izjavljena od strane ovlaštenog lica.

U slučajevima kada je žalba neblagovremena, ili izjavljena od strane neovlaštenog lica, žalbu će odbaciti rješenjem.

Član 31.

Odluka Upravnog odbora Komore medicinskih sestara-tehničara je konačna i protiv iste se može pokrenuti upravni spor pred nadležnim Sudom.

Član 32.

Izrečene mjere za povrede dužnosti i ugleda sestrinskog i primaljskog zvanja članu Komore moraju se izvršiti u roku od trideset (30) dana od dana pravosnažnosti odluke.

Mjera – kazna opomena izvršava se saopštavanjem iste članu Komore i Tužitelju Komore.

Mjera – kazna javna opomena izvršava se isticanjem iste na oglasnoj tabli Komore i njenim objavljivanjem na web stranici Komore.

Mjera – kazna privremeno i trajno oduzimanje odobrenja za samostalan rad – licence i oglašavanje člana Komore nedostojnim za obavljanje sestrinske i primaljske djelatnosti izvršava se dostavljanjem odluke i donošenjem konačnog rješenja Predsjednika Komore o oduzimanju odobrenja za samostalan rad članu Komore i Tužitelju Komore.

Član 33.

O izrečenim mjerama-kaznama zbog povrede dužnosti i ugleda sestrinskog i primaljskog zvanja člana Komore vodi se evidencija u Komori.

Mjera – kazna opomena i javna opomena briše se iz evidencije istekom roka od dvije godine, a mjera – kazna oduzimanje odobrenja za samostalan rad, briše se iz evidencije istekom roka od tri (3) godine od dana izvršenja.

Mjera – kazna oglašavanje člana Komore nedostojnim za obavljanje sestrinske i primaljske djelatnosti briše se iz evidencije istekom roka od pet (5) godina od dana izvršenja.

VI

PRELAZNE I ZAVRŠNE ODREDBE


Član 34.

Ovaj Pravilnik stupa na snagu danom donošenja odluke na Skupštini Komore medicinski sestara-tehničara Zeničko-dobojskog kantona.

Ovaj Pravilnik je objavljen na web stranici Komore medicinski sestara-tehničara Zeničko-dobojskog kantona: www.komzedo.ba

Stupanjem na snagu ovog Pravilnika prestaje da važi Pravilnik o odgovornosti članova Komore zdravstvenih tehničara Zeničko-dobojskog kantona broj: 01/1-7 od 20.03.2001. godine.

Predsjednik Skupštine


Bajramović Amel, dipl.med.tehničar

Broj: 01-20/2023

Zenica, 21.03. 2023. godine

